

Spirit of Bosnia / Duh Bosne

An International, Interdisciplinary, Bilingual, Online Journal
Međunarodni, interdisciplinarni, dvojezični, online časopis

Nagrada "Slovo Makovo - Mak Dizdar"

Editorial Board

Zbirka "Hyperborea" našeg dugogodišnjeg saradnika, pjesnika Milorada Pejića, nagrađena je novoustanovljenom nagradom Grada Sarajeva "Slovo Makovo - Mak Dizdar" za najbolje poetsko djelo objavljeno u prethodnoj godini na bosanskom, crnogorskom, hrvatskom i srpskom jeziku.

Nagrada je ustanovljena na inicijativu gradonačelnika Grada Sarajeva profesora Dr. Alije Behmena, a rezultat je saradnje Društva pisaca BiH, Grada Sarajeva, PEN Centra u BiH i fondacije "Mak Dizdar".

Prestižna nagrada uručena je pjesniku Pejiću 23. novembra 2012. u Narodnom pozorištu, na zajedničkoj svečanoj sjednici Skupštine Kantona Sarajevo, Gradskog vijeća Grada Sarajeva, SUBNOR-a BiH i opštinskih vijeća kantonalnih opština u povodu obilježavanja Dana državnosti Bosne i Hercegovine.

Milorad Pejić rođen je 1960. u Tuzli, studirao je u Sarajevu, a od ljeta 1992. živi u Švedskoj. U književni život ušao je knjigom pjesama "Vaza za biljku krin" (*Svjetlost* - Sarajevo, 1985.), koja je naišla na izuzetan čitateljski i književnokritički prijem. Druga knjiga pjesama "Oči ključaonicâ" objavljena je dvojezično, na bosanskom i njemačkom, u izdanju *Bosanske riječi* (Tuzla - Wupertal, 2001, te ponovljeno redigirano izdanje 2012.). Posljednja zbirka "Hyperborea", nagrađena "Slovom Makovim", izašla je 2011. na našem jeziku u izdanju praške izdavačke kuće *Aula*.

U skladu s našim uređivačkim credom i opredjeljenjem da nastavimo i intenzificiramo naša nastojanja na polju artikulacije i davanja podrške nenacionalističkom razumijevanju temeljnih kulturnih, etičkih i socijalnih odrednica Bosne kao historijskog entiteta - redakcija Duha Bosne pozdravlja i podržava utemeljenje nagrade "Slovo Makovo - Mak Dizdar", te upućuje srdačne čestitke njenom prvom laureatu Miloradu Pejiću.

Kao specijalni novogodišnji dar našim čitaocima objavljujemo u ovom broju tri nove Pejićeve pjesme.



The preceding text is copyright of the author and/or translator and is licensed under a Creative Commons Attribution-NonCommercial-NoDerivs 3.0 Unported License.